

halb mäßel Roseneßig darzu gethan/ vnd  
ein halb lot Alaun klein geriben/ schlags  
alles wohl durcheinander/ vnnnd legs auff  
die Puls der händ/ des Tags drey oder 4.  
mal/ auff Hänffen werck gestrichen/ oder  
darinnen geneßt Büschle weiß.

Ist es aber von verfäulung der Feuch-  
tigkeit/ so mache diß Pflaster/ auff das  
ort da du die stiche bestindest/ darzu nimb  
Milch/ Honig/ jedes ein mäßel/ Weizen  
mähl/ Saffran/ vnd Häch tenzän/ jedes 2  
lot/ klein geriben/ durch einander wol ge-  
rürt vnd gekocht in ein Hasen/ darnach  
auff ein Tuch gestrichen/ vnnnd so warm  
als ers erleiden kan/ auff die blosser Händ  
gelegt/ biß das stechen vergeht.

**Für das Apostema so volle Bräu-**  
der oberköffen von oberigem sauf-  
fen/ auff der Lincken  
Seiten.

Das LI. Capitel.

So

**S**o nimb Eychene rinden/ von ei-  
ner jungen Eychen/ nahe bey der  
Erden/ so dick als ein halbs Ey/  
von der Mittleren rinden/ Schlehenblüe/  
Krausmünzen/ jedes ein halbe handts  
voll/ Wasser vnd Wein jedes anderthalb  
kandel/ Eßig ein mäßel/ Honig ein Löffel  
voll/ laß es halb einsieden/ das trincke er/  
vnd anders nichts/ vnd Esse auff den Ab-  
end nit viel/ vnd nach dreyen tagen nimm  
zu der enderung des Trancks/ Salbey  
blüe/ Schlehenblüe/ jedes ein halbe handts  
voll/ Krausmünz den vierten theil einer  
handvoll/ vnd siede es/ wie den vorgemels-  
ten Tranck/ Trinck für vnd für/ biß du  
gesund wirst vnd kein Wein.

So aber das Blut so hefftig gehn wol-  
te/ so nimb Salbey vnd reib sie zu Pul-  
ver/ thu sie in 2. Löffel voll guten scharfs-  
en Weineßig/ davon nimb vnderweilen  
ein halben Löffel voll/ biß das Blut gar  
versteht.

So aber mit hauffen das Blut auß  
de mund gieng/ so nimm Buchholderkraue  
ein

ein halbe handvoll/ Salbey halb so viel/  
 Dohsenzungenblüe/ so dick als ein halbe  
 welsche Nuß/ anderthalb kandel frisch  
 wasser/ vnnnd ein halbe kandel voll Esig/  
 laß den halben theil einsieden darvon  
 trinck bisweilen ein löffel voll oder 2. oder  
 3. Doch deß Apostems tranck/ trinck eine  
 weg wie den andern/ bis du gesunde bist/  
 vnnnd purgiere dich mit dem giffte Pulver  
 ʒ. quintel/ doch gar auff die lezt/ nach dem  
 apoltema, so du schier nichts mehr be-  
 findest.

Sür das Apostema auff der  
 rechten Seiten.

Das LII. Capitel.

**D**Arzu nimb der mitleren Kinder  
 von einer jungen Eychen/ so vast  
 auff der Erden wächst/ ein hand-  
 voll/ Dohsenzungenblüe ein halbe hand-  
 voll/ Salbeyblüe den vierdten theil einer  
 handvoll/ rothe Kraufmünß/ so dick als  
 ein hünerey/ wasser anderthalb kandel/  
 Wein

Wein ein halbe kandel/ Esig ein seidel/  
 laß halb einsieden/ davon trinck auff ein  
 mal j. Löffel voll/ oder mehr/ sovil du wilt.

Vnnd so ihm zuheiß würde/ vnd das  
 Apostema zu starck/ so gib ihm vnderwei-  
 len einen Löffel voll Leinöl zutrincken/ bis  
 das apostema zerbricht/ darnach ender  
 ihm den Tranck also:

Nimb Eychene Rinden die mitlere ein  
 handtvoll/ Rosmarin oder Kleeblüe/ ein  
 kleine handvoll/ Nesseln siede ein halbe  
 handvoll/ wasser anderthalb maß/ Wein  
 ein halb maß/ laß halb einsieden/ davor  
 trincke/ bis du heil bist.

So aber ein voller Bruder ein Aposte-  
 ma vberkäm von vberigem trincken/ dem  
 gib Scorpionöl ein Löffel voll/ zwen oder  
 drey also kalt/ so bricht er sich vrpflüsslich/  
 darnach trincke den vorgemelten tranck.

So einer ein Apostema vberkâme/  
 von weichem Wein/ oder faulem Bier/  
 welches offte geschicht/ das die Armen  
 Leuth sterben müssen/ vnnd wissen doch  
 nicht wie es ihnen widerfahren ist/ So

F

nimb

nimb Sinngrün/ Odermennig/ jedes ein halbe handvoll/ weisse Rhebarbara/ Steinzwibel jedes anderthalb quintel/ wasser vnd Wein jedes anderthalb Maß/ das laß halb einsteden. Davon trinck so viel du kanst/ oder magst/ vnd laß es nit Alt werden/ sondern mach dir immerzu ein frisches/ vnd nimb des Giffpulvers ein halb quintel/ bis du gesund wirst.

## Von der Lungen.

### Das LIII. Capitel.

**I**m ersten/ so einem die Lunge auffsteigt von hitz/ oder von hitzigen Flüssen/ So nimb ein frisch Brunnenswasser 3. oder 4. Löffel voll. Darzu nimb Vierbaummistel j. quint/ klein geschnitten/ oder gepulvert/ diß eingenommen/ das thu etlich mal/ so wirt sie sich seizen/ So aber ein hitziger Fluß darauff siele vnd zähe were/ das er sich vmb die Lunge aufschlüge/ vnnnd einem der Athem gar eng davon würde/ so nimb diß Pulvers ein

ein halb quintel zu Abent/ vnd des Morgens  
 j quint/das thu 3 Abend vnd 3 mor-  
 gen nach einander/das mach also: Nimb  
 Senecbletter 2. loth/ Langen Pfeffer/  
 weissen Imber/ jedes ein quint/ Fenchel-  
 samen ein halb loth/ Pulverier das klein/  
 vnd brauche es wie gesagt ist/ bis die  
 Kranckheit nachlaßt.

So aber einem von hitzigen Flüssen  
 die Lunge so häfftig beschwert würde/ das  
 er zu keinem Athem kommen könnte/ so  
 brauche diß pulver/ Nimb Eisenkraut ein  
 lot/ Rebarbara j. halb lot/ bereit Agarici  
 ein quint/ dise stuck pulverier klein/ vnd  
 mische sie vndereinander/ davon gebe  
 man einem des morgens ein quint/ vnd  
 des abents ein halb quintel/ drey Abende  
 vnd 3. morgen nach einander/ vnd trinck  
 des obgemelten trancks bis es besser wirt.

So sich die Lunge pläet von  
 kalten Winden auß dem Ma-  
 gen oder Milk.

F ij

Das

**D**em gibe diß Pulver zu essen/ das  
 mach also: Nimb Cardobenedi-  
 ctenkraut 3. lot/ Haselwurzel an-  
 derthalb lot/ Enzian ein halb lot. Diese  
 stuck siede zuvor in gutem Esig 3. mal/  
 darnach truck sie auß/ Pulverier sie/ vnd  
 esse sie/ biß der Athem besser wirdt/ das  
 mußt du darauß mercken/ so er für vnd für  
 Mißwehetagen befindt/ oder schmerzen  
 an der Lincken Brust/ So aber solch faule  
 dämpff kämen von der Leber/ Gallen oder  
 Magen/ so befindest du alleweg schmerzen  
 in der rechten Seiten/ vnd beschwerung  
 am Athem/ vnd auff der rechten Seiten  
 neben dem Herzgrüblein/ bißweilen sti-  
 che/ Darfür nimb Alantwurzel ein loth/  
 Braun Bethonica 2. handvoll/ Nesseln  
 siede drey handvoll/ Corrigiert Aaron-  
 wurzel 4. lot/ weissen Andorn j. hand-  
 voll. Diese stuck Pulverier alle klein/ vnd  
 esse darvon zu allen Speisen. So es aber  
 nit weichen will/ so neme diß Tränck-  
 lein

lein darzu/ das mach also: Nim Pfirsing  
blüe/ Genskraut/ Salbenblüe/ jedes ein  
halbe handvoll/ Wasser vnd Wein/ jedes  
anderthalb Randel/ laß halb einsieden/  
das trinck/ so aber die Person bleich were  
im Angesicht vnd kalt von Natur/ so nim  
lauter Wein/ vnd siede es wie gesagt ist.

So einem die Lunge faulet von  
einem erstickten Apostema.

Das LV. Capitel.

**S**uche die Ursach des Apostems/  
vnd nim Schlehenblüe ein hand-  
voll/ Scabiosawurzel anderthalb loth/  
Ehrenpreis ein kleine handvoll/ wein vnd  
Wasser jedes anderthalb Randel/ Eßig 4.  
löffelvoll/ Honig 2. löffel/ laß halb einsie-  
den/ davon trincke des tags 4. mal oder  
mehr/ biß der schmerz verschwindet.

So aber von der Rechten seiten ein A-  
postem käme/ so esse diß Pulver/ das mach  
also: Nim Buchholderwurzel 5 lot/ Weis-  
F iij ster-

sterwurzel 2. loth/ Diese stück siede zuvor  
in geringem Eßig vff zehen wall/ doch ge-  
schwinde/ das es nicht lang darinnen lie-  
ge/ darnach gepulvert vnd getruncken.

Darzu nim̄ Beyelwurzel 3. lot/ Eisens-  
kraut 3. handvoll/ Buchholderkraut zwo  
handvoll/ Diese stück alle zusammen ge-  
pulvert/ davon gessen/ mit dem vorigen  
tranc̄/ bis er gesund ist/ vnd schlage diß  
pflaster auff die Leber/ Darzu nim̄ ireos  
wurzel 6. lot/ gepulvert/ darüber geuß ein  
halb maß Eßig/ laß es darinnen stehn 6.  
stund/ darnach senhe es ab/ vnd trückne  
es/ vnd pulveriers/ Darzu nim̄ Nessel-  
seiten 3. handvoll/ Teutsche Rebarbara  
zuvor in weissen Wein gelegt 3. stundt/  
darnach wider abgetrücknet/ 2. lot Mus-  
catblüe/ anderthalb lot Salbeyblüe. Dise  
stück alle klein gepulvert/ vndereinander  
vermischet/ darzu nim̄ Salbeywasser 6.  
Löffel voll/ Eßig 4. löffel voll/ Jungfraw  
wachs/ Terpentin/ das es genug seye/  
zerlasse es zuvor/ vnd thu die obgemelten  
Species darcin/ vnd mache ein Pflaster  
Darauf

darauff/ dasselbige auff die Leber gelegt/  
bis der Fluß gar verzehrt ist/ also genug  
von der dörrer der Lungen geredt.

## Von auffstossen der Mutter.

### Das LVI. Capitel.

**S**chickige Fluß von oben herab  
fallen auff die Mutter/ so bläet sie  
sich darvon/ vnd fährt vbersich/  
dann sie wirdt darvon verstopfft/ darfür  
nim̄ Beyelwurzel 4. lot/ Eybischsamen/  
Steinbrechsamen / jedes ein halb loth/  
Krebsaugenstein ein loth/ Bethoniens  
samen anderthalb loth/ dise stuck klein ge-  
pulvert/ davon nim̄ Abends vnd Mor-  
gens j. halb quint mit Lindenblüewasser/  
oder mit Wein/darinnen Lindenblüe ge-  
sotten ist/ bis sie gesund ist.

So aber die Mutter mit kalten Flüssen  
beladen wer/ vnd verstopfft/ der hilff also:  
Nim̄ Metterigkraut/ Wolgemut/ Bey-  
fuß/ Neinfarrenkraut/ jedes ʒ. handvoll/  
S iiii Diese